



Dao wo ich gebaore bèn Oetgaaf van Veldeke krènk Zitterd Zitterd-Gelaen-Bor



Jaorgank: 29 Nr. 47
Mei 2016

Weurdje veuraaf: Effe veursjtèlle,

"In dees oetgaaf"

Verhàölkes en gedichten
gesjreve door:

Christianne Bergman-Göttgens
Leon van Binsbergen
Lizette Colaris
Zef Dullens
Wiel Gielkens
John Hertogh
Jean Knoors
Phil Schaeken
Ralph Schaeken
Carina Scheepers-Daniëls
Patrick Werdens
Jos Zelis

Foto's:

Leon van Binsbergen
Harrie Claessen
Patrick Werdens

Veurzitter:

Jean Knoors
Kastanjestraat 8
6127 EA Grevenbicht
046-485.72.06
j.knoors@kpnplanet.nl

Sikkretariaat:

Patrick Werdens
Chr. Kisselsstraat 3
6131 BV Sittard
Til: 0464587140
p.werdens@gmail.com

Bankraekeningnómmer
Rabobank Zitterd-Gelaen
O.v.v. Vedekekrenk Zitterd
NL85 RABO 0187 6214 54

Lay-Out en samensjtèlling:
Harrie Claessen oet Beeg

In 't veurige nummer van oze Nuutsjbreef **DWIGB** waar groat nuutsj te melje, waeges 't samegaon van de Veldkekringe Zitterd en Gelaen.

Det besjloet sjlut prima aan bie de groate Gemeinte Zitterd-Gelaen, woo de neet geneumde kleinere plaatse netuurlik een hieël belangrieke plaats innumme die zeker neet minder is dan die van de drie geneumde plaatse Zitterd-Gelaen-Bor. In ein gemeente twieë Veldekekringe kump op de boetewaereld toch waal 'n beetje vraemd euver. Daoróm is 't samegaon van de twieë Veldekekringe op zichzelf 'n gooj zaak. Mer det beteikent waal, det 'r mieë werk aan de winkel is. En det hijt in, det 't besjtuur versjterk en oetgebrijd moosj waere, óm tot 'n nuuj taakverdeling te kènne euvergaon. Vanaaf 't samegaon van de kringe haet Jos Zelis, de sikkretaris van de Krènk Gelaen, al zitting genómme in 't kringbesjtuur. We zeen aevel blieve zeuke nao mieë besjtuursleje en zeen dao ouch prima in gesjlaag.

Effe veursjtèlle

't Is daoróm, det v'r Uch mit vööl plezeer drie nuuj besjtuursleje kènne aankondige en die zich zelf aan Uch wille veursjtèlle:

Ich bèn Carina Scheepers-Daniëls




Ich bèn gebaore in 1974 in Zitterd. Ich bèn getrouwd mit Mat Scheepers en same hóbbe veer 2 kènjer: Eva en Stan, respectievelik 14 en 11 jaor awd.

Ich kòm oet t òngerwies (hób veur de klas gesjtange van 1995- 2005), mèr momenteel wirk ich in ein kapsalon en daobie wirk ich es vrieilliger in t Toon Hermanshoes wo ich kènjer t/m 12 jaor begeleid. Dees kènjer zeen dèks emes kwiet geraak aan kanker of waere toes mit dees krenkde geconfronteierd.

Ich kóm oet ein richtig zittesje femieje en ich hób de aw tradities en de sjpraak goud mitgekregge. Ich hób mich ouch ummer hievueur geïnteresseierd. Daoróm vènj ich 't

belangriek dat dees wezelike zaken wie taal en cultuur behawte blieve.



Effe veursjtèlle, vervolg

Ich bèn Christianne Bergman-Göttgens



Ich bèn 47 jaor awd en in Zitterd gebaore. Mien auwesj zeen gans van Zitterd, veer hóbbe toes altied Zittesj gekald. Van mien mam hób ich het echte Zittesj gout geleerd. Miene opa (Zef Arnoldts) leerde mich auch vól Zittesje weurd. Hae waar heel sjtremg dao in.

Ich bèn getrouwd mit Frank Bergman, eine oet Moergestel (Noord Brabant). Veur hóbbe drie zeuns. Lars, 14 jaor, Stan, 12 jaor en Lucas van 10 jaor. Ich woon saer 5 jaor weier in Zitterd en hób daoveur 4 jaor in Antwerpen en 7 jaor in Zwolle gewoond. Mit de kenjer hób ich altied Zittesj gekald. Ich bèn erg geïnteresseerd in de Zittesj taal en de Zittesje tradities!

Ich bèn Ralph Schaeken

Ich bèn gebaore en getaoge in Zitterd, 41 jaor awd, greutsje pap van dochter Julia van veier en zeunke Abel van twee. Nao bienao 10 jaor in Spanje en Dutsjlandj gewoond en gewirk te hóbbe, zeen veer ach jaor geleeye terók nao Zitterd gekómme, wo veer weier mit vól plezeier wone. In mien dageliks laeve wirk ich es treasurer. Ich vènj de Limburgse taal van groot belang, ómdat ze ein rieke taal is die euver de grenze haer geit, al eeuwe lank gekald wurt en van generase op generase is doorgegeave. Gaer zèt ich mich dan ouch in veur 't Limburgs en 't Zittesj door nao 't verleje mer ouch nao de toekoms te kieke. Ein taal verangert, ouch 't Limburgs, jus wie de luu die 't kalle, dit heurt d'rbie. 'T veurbesjtaon van 't Limburgs is aevel, jus wie b.v. dat van 't Holles, op lange termien neit vanzelsjpraekend. Daoveur is van groot belang dat ein Sjtichting wie Veldeke perbeiert zo'n sjoon taal laevendig te hawte. Ich wil hie gaer aan mitwirke!



Ich bèn Jos Zelis



Ik bèn Jos Zelis, 67 jaor awd en al vól jaore lid van Veldeke. In 1969 begoosj es óngerwiezer in 't lieëger-óngerwies en in 2014 oetgesjeijd es lieëraar Nederlandjs in 't Middelbaar-Beroeps-Óngerwies (MBO). In 2014 is de Veldekekrink Gelaen e.o. opgegange in de Krink Zitterd. Óm de leje van de Krink Gelaen e.o. bie te sjtaon, bèn ich lid gewore van 't besjtuur van de Krink Zitterd. Tot noe toe is mich dat oetsjtaekend bevalle. Mer 't blif meujelik óm aktiviteite in 't Gelaense te organezere en zoa de (awd)leje van de Krink Gelaen e.o. daobie te betrekke. Mer weer gaon ós d'r erg veur insjpanne, det zake ouch in Gelaen weer van de gróndj kómme.

Mien sjtraeve is en blif 't dialek aan te prieze. Dao vandaan det ich mich same mit Bert Lemmens en Luc Brouns al vól jaore mit plezer inzèt, veur de dialek-aovond van de basissjoale, dae al mieë es 60 jaor in november gehawte wurt. Dit jaor zulle veur 't ieës ouch twee lieëgere sjoale oet Zitterd en Bor mitdoon. 't Wurd zeker weer 'ne aovond mit zieër entoesiaste kènjer en auwers.

Belangriek is, det de óngerwieskrachte de kènjer blieve poesje óm mit te doon aan de dialekaovend. Mien opdrach is 't dan ouch, óm de lieëkrachte daoveur entoesiast te make. Allein op dees meneer blif oos dialek in sjtendj en behawte es 'n belangriek deil van oos volkskultuur.

Weer heite de nuuj besjtuursleje ouch vanaaf dees plaats van harte welkom en hóbbe d'r 't volste vertroewe in, det de gemeintebrei-je Veldeke-Krènk Zitterd 'n gooj toekoms ingeit ónger 't gezègkde oet de waereld van de sjippers: **"Volaan veuroet!"**

Jean Knoors,
Veurzitter.

Email adresse

Veur wille uch gaer baeter op de heugte gaon hawte van activiteite van de Veldeke krènk Zitterd. Óm dit via de traditionele pos te doon lóp ós aevel te vól in de pepiere. Veur wille uch dan ouch via email op de heugte hawte.

Veur hóbbe dan waal eur email adres neudig. Laote veur veurop sjtèlle dat veur dit emailadres allein gebroeke veur communicatie euver Veldeke activiteite.

Veur sjtèlle 't op pries es geer eine email zout sjikke aan: veldekezitterd@gmail.com en es óngerwerp vermelje: eure naam en adres

Dit kènt ós flink get geldj gaon sjaele dat veur weier kènne gebroeke óm veur uch get sjoons te organiseiere.

Alvas dank veur eur muite!



Ens loug dao.....

Krómbreudjesrape

.....*dat sjoon sjtadhoes,*
bizunjer es geboe, mit bordès en trappe.
Dao góngste veur te trouwe en anger zaakes,
euver de plisse gaon ich niks verklappe.

.....*Hel en Paradies,*
ein Zittesje volksbuurt mit al dróm en draan.
De luukes waare gelökkig en tevreë,
waat is noch: 't Wienhoes en kafee de Vaan.

.....*'t Serviam veur maedjes,*
't ein noch sjooner dan 't anger.
Jonges koume langs, mer neit om te sjtudeiere,
de sjooltied doerde dan ummer get langer.

.....*de Sjiefbaan,*
ein sjoon sjtukske van ózze wal.
Me haw 't neudig veur de "business",
noe weit veer : geweun sjaele kal.

.....*de Verkesmert,*
boere mit hun vee koume nao Zitterd geloupe.
'r Woort gehanjelt en op aafsjaag verkoch,
gein stökske , 't ganse bees moosj me koupe.



Ens loug dao.....

Zo kèn ich noch efkes doorgaon.

Mèr.....

**waat versjtenjiger is, pak uch allenej biejein en zörg
dat waat euver is, blif besjtaon**

Léon van Binsbergen 2016



Hawfvaste, naat, pratsj oppe berg,
dao kómme ze aan, karre mit meziek,
heur 't Hermenieke, en dao de Kroenekrane,
kiek Dutsje helme, zjwarte, zuse, sjus Pruse !
Gein soldaote, sjtoer kiekend, mer luuj mit lachende gezichter,
de Dörpelmaeg deile breudjes oet,
ich bèn in Zitterd, sjtedje van plezeier,
läötjes gaon róndj en pötjes beier.

En dan geit 't los !
Op muzikale klanke vleige ze door de lóch,
jederein vink mit, d'r is genóg,
drek oppe berg, drek oppe bóks, voel sjtevele,
voel henj, rótsje oppe vot, biete oppe tenj,
breudje pratsj, de patsj van opa zak sjeif,
't is nog neit gedaon,
hae geit nóg sjteviger sjtaon.

Ein urke gelök,
effe trök nao kèndj zeen,
weier wirke veur brood,
veur breudjes, hawf maon,
drek in de móndj, bitsjke gróndj,
lachende breudjes,
dan weier ómleeg,
nao de mert, nao hoes.

Voel bóks, voel henj ,
vol tute, vol tesje, tèle wiewäöl,
verhaole vertèlle, henj wesje,
sjtil pruive, die sjmake !
Zelf gevange, zelf gesjtange,
ómhoogkiekend de berg op gegange,
Zitterd leit zich weier zeen,
awd gebroek, van vader op zoon.

Sjoon, sjoon, sjoon !

Phil Schaecken

Aeve Prakkedènke

Nao de dónker wèntjermaonje wille veer uch weier 't gelaeg gaeve óm eur kènnis te teste van de get awwer, neit mee zo vööl gebroekde weurd.

Veer höbbe zelf ouch ein tiedje zitte te dènke waat veur weurd veer de revuu weier wille laote passeiere. Bekiek 't èns en doot eur bès.

1. Kuus

- a. Verke
- b. Forsje kael
- c. Jóngesnaam
- d. Sjaop

2. Óngebeet

- a. Roew
- b. Ungesjte tenj
- c. Óndankbaar
- d. Mit aoepé móndj aete

3. Tankel

- a. Aoligopsjlaagplaatsj
- b. Sjerpe punt
- c. Sjeynaam
- d. Haok óm get op te hange

4. Óchtere

- a. Euvergaeve
- b. Oetbrenner gaeve
- c. Versjnóp zeen
- d. Buurte

5. Voelvalle

- a. Get waat verkeerd oetpak
- b. Wisselgeldj
- c. Gebrazel
- d. In de pratsj valle

6. Zelewermer

- a. Pesjtoor
- b. Wölle vrouwluujas
- c. Dröpke
- d. Werm kroek

7. Sjappeiere

- a. Maedje begeleie
- b. Kemisses doon
- c. Óntkómme
- d. Verve

8. Koevaer

- a. Sjtart van ein kouw
- b. Teiere en besjte
- c. Korperaol
- d. Breifómsjlaag

9. Flabbetich

- a. Kènjlerlik
- b. Knien mit lang ore
- c. Öpelik
- d. Zelf verzónne

10. Kouwmaat

- a. Auw lengtemaot
- b. Erg verkauwd zeen
- c. Maedje waat ein kouw mèlk
- d. Gouwe vrundj



Zittesje Mès



Op 12 juni e.k. is 't twee waeke nao Sakramèntsdaag en dan zal tradiesetroew weier de jäärlikse Dialek Mès van ós plaatsj höbbe. Sjus wie de veurgaonde jaore zal dees ouch dit jaor weier gehawte waere in de Basiliek in Zitterd. 't Thema van de mès is dit jaor: God vergaef mich! Ein thema wobie mènning Zitterder zich de wènk-brouwe zal fronse mer dat kump gans goud. Bie gelaeg van 90 jaor Veldeke Limburg höbbe veer dit jaor eine bezunjere zenger weite te sjtrikke veur de mès; en waal in de persoon van Martin Hurkens.

Anger jaore zoute de benk in de mès al gaw vol. Dus veer adviseiere uch óm op tied in de Basiliek te zeen. Aanvank 10.00 oere.

gedich?

op 't eesjte gezich
haet zie 't in zich
of haet zie gein inzicht?

't is gein gezich
zie mit ein zich
graas in 't gezich!



©johnhertogh

'N IËUWIGHEID.....

Hae ging veur 't iès op kamp,
de roewe tòsj, dae kleine rebel.
Mer hae vònj 't geine ramp,
al veel 't leste mulke 'm waal hel.

Efkes haw 'r ropend boete gesjtange,
of 'r Poemeltje neet zaog.
't Bièsjke waor vannach oet hoes gegange,
terwiel 't anges op 't kösse laog!

Same lepe ze nao de bös,
in de vreuge mörgezòn.
Mamma zag: "Bèn mer gerös,
veer daag zeen zoa weer òm!"

Mer wie ze d'n hook òmkaome
sloog hun de sjrik òm 't hart.
Ze òngerdrökde mit geweld de traone
òm 't katte-liekske, sjtief en zjwart!

Efkes mer haet 'r sjtil gesjtange,
't kaelke veulde zich erger dan krank.
Mer 't kamp is doorgegange,
veer daag: waal 'n iëuwigheid langk!

Jean Knoors

**Euver moele sjnieje, floep hóbbe,
eine kröppel en nog vääöl mee !**

SITTARDSCH

DE BRÓNK



Ich sjreef d'r al èns eder euver, euver gezègkdes, weurd, oetsj-praoke die me neit mee zo dèks heurt. Of toch nog? Dat mó't geer zelf mer bekieke.

Aafgeloupe jaor haw ich thoes ein blaedje ligke wo ich ein en anger opsjreef es ich get in genuimde richting meinde te heure, es ich dach: 'Hei, effe opsjrieve, want dat hób ich al ein tiedje neit mee geheurd !' Ich noteerde ó. a. 't volgende:

'Dao sjtik's te eine de ouge mit oet.'
'Waat waar mich dat einen ambras, dao bie die verhoezing !'
'Dat kèndj is oet de hèl gekraope.'
'Dae kènt moele sjnieje.'
't Haet gein rös in de prie.'
'Is dae op eine kouwgum aan 't knawwele ?'
'Ich waar vaerdig wie ein kemunejeske.'
't Haw pis wie e Belsj kènjermaedje.'
'Dat is mich eine bökkum.'
'Hae sjtóng dao wie e kleije livvenheerke.'
'Hae is drök wie e klein baeske.'
'Dat kiendje haw richtig floep veur häöm.'
'Doe bès mich ein vaeg !'
'Dat is richtig kerkesvolk.'
'Hae haet de bóks op hawf zeve hange.'
'Dat haet mich richtig de pis werm gemaak.'
'Dat minsj verköp richtig sjaele zeiver !'
'Dat waar dao ein deftige perplu.'
'Die moder haet d'n hemel verdeind !'
'Waat tunks dich, doon veer 't of neit ?'
'Hae haet ouch nog allerlei sjiet veil.'
'Dat is ein richtige kakmadam.'
'Hae fruitelde zo lang pès 'r 't haw.'
'Waat is dat ein flök maedje.'
'Dae kael haolde mich dao fratse oet.'
'Dat vrouwmesj is ein gouw blötsj.'
'Dae kleine kröppel lachde d'r ouch nog mit !'
'Dat klop dao allewiele van beits kènj neit.'
'Ich vènj dat bès kwant.'
'Is 't zeiverlepke noe al voel ?'
'Dat deig wie Henske de gek.'
'Doe koum die aw tut ouch nog op bezuik !'
'Zie haet thoes de bóks aan, hae is eine richtige zökkezuimer.'

Phil Schaeken

Zomerkirmes trék de Brónk oet
Euveral is sjoon geseird
Mit papiere bóntje katsj'le
Zeen de sjtraote gegarneird.
Woo d'r zeit - aan deur of vinster
Kaerse brènne - bloumeprach.
Van versjeije rösaltaore
Wurt de zaegge sjtrak gebrach.

Vane vleige - klokke loe-e,
Bruudjes, kraole euveral
En in Paosjbèste mantoering
Jeder dae mit trèkke zal.

Sjtampend-vol is 't in de Hoomes
't Koor baad in ein zee van leich,
Van d'n ekzaol sjwaor orqeltoone
Plechtig door de zank begleid.

Lanksaam kump dan de persessie:
Es simbool 't kruuts veurop,
Meistesj mit hun klasse volge,
Kénger bae-e flink hel-op.
Vereiniginge - kónkreqaassies,
De Raod - mer dèks neit gans bie-ein -
En, door d'Eerewach ómgavee,
Geis'lik - ónqer "baldakijn".

En zoo trèk ze door de sjtraote!
Greutsj zeen veer op zoo ein prach.
Es de zaegge wurt gegavee
Wurt gesjmeik - en dank gebrach.

Maag de Brónk hie ummer trèkke
Zoowaal in veur- es taegesjpoud,
Laot ós ummer dit behaute,
Went - de fóng - is hie toch goud.

Mit dit plechtig sjoon gebeure
Is get - waat neit mousj besjtaon:
Dat vääöl luuj in vinstesj likke
Die zoo goud mit koosjte gaon.
Waal sjpraeke die van sjoon tradiesies,
Vènje - och - de Brónk zoo sjoon,
Mer óm zellef mit te trèkke
Hóbbe zie - sjient neit vandoon.

Brèk daomit - en leifs nog huuje,
Tuint Uch flink - en eur besjloet
Is went weir de Brónk geit trèkke
Dan..... dan trèk ich ouch mit oet..

Zitterd, Aug. 1940. Zef Dullens



Bron: Veldeke, orgaan van V.E.L.D.E.K.E. 15^e jaargang No 85 Oct. 1940.

T Versjil

Es-te t mich vreegs
Is t laeve mer sjus wie-ste
Durfs te laeve
Kiek, dr zeen luuj
Die danse door dn daag
En dr zeen luuj
Die sjravele en kuume

Es-te t mich vreegs
Is t laeve gein rechte lien
Van hie beginne en
Dao oetkomme
Dat alles dan ouch geit
Zo wie-ste dat verwachs

Es-te t mich vreegs
Is t laeve ein wònjerlik gebeure
Jeedere daag
ein anger dènk

Mer
Es-te in sjtaot bes
d'r mit te danse
Te lache mit dae eelènj
Op diene waeg
Veuroet te kieke
Te bewaege mit
de vòlgende bewaeging
van daen dans
Dich euver durve gaeve
Aan waat noe einmaal
Toch
Gebeurt

In en oet
De maot

Dat maak, geluif ich,
Ein laevesgroot versjil

©LColaris 12092015

Lere aaflere

Lere aaflere
Is lèstig
Eesj numse get aan
Dan geise dat doon
En dan blik

Dat t neit wirk
Of neit moug
Of neit kan
Of neit blif
En mot aafgeleerd

Aafgesjwaore
Waat geleerd waar
Weggedaon
En ummer weier
Kump dat eesjte

Waat geleerd waar
Eigewies en köppig
Trök
Wil gein plaatsj make
Veur t geleerde

Opruime waat neit wirk
Of neit geit
Of neit kan
Of neit blif
Dát is de kúns van laeve

Ummer opnuuj
Bekieke en
aafkieke
Dat móug -
In de sjool
Van t laeve...


©LColaris 28102015



Jaorprogram

Veurjaor Kunstwanjeling door Gelaen

- 12-06** **Zittesje Mès** **Basiliek in Zitterd | aanvank 10.00 oere**
- 10-09** **Krènge Kóntakdaag in Zitterd Besjtömp veur de besjture van de Veldeke krènge**
- 24-09** **Versjieningsdatum Sjeurkalender 2017**
- 24-09** **Reubsæet trök in Zitterd** **Forum in Zitterd | aanvank 14.30 oere**



- Naojaor** **350 jaor Kesjteel Born** **Wanjeling langs Kesjteel Born**
- 04-11** **Jeugdveurdrachsaovend** **De Hanenhof in Gelaen**
- 11-12** **Krismiddig** **Basiliek in Zitterd | 14.30 oere**
- 13-12** **Krisdictee** **Mariapark in Zitterd | 19.30 oere**

Reubsæet trök in Zitterd



Bie gelaeg van 90 jaor Veldeke Limburg zal in Zitterd op 24 september óm 14.30 oere ein bezunjer festiviteit plaatsjvènje in 't Forum. Veer brènge uch dan eine middig mit Nicolaes Reubsæet in de houfrol.

Tekssjriever Ron Roumen is op dit moment flink ómgang óm de lèste handj te lègke aan 't toneelsjtök; hae zörg d'r veur dat dit toneelsjtök ein bezunjer sjpektakel wurt. Naeve 't toneelsjtök zal bariton Math Dirks de zank veur zien raekening numme en zal de hermenie St. Joseph ó.l.v. dirigent Björn Bus veur de muzikale ómliesting zörge.

In de aanloup nao 24 september zulle veer uch op de heugte hawte van dit bezunjer Zittesj evenement. Mer hawt uch de datum en tidsjtíp alvas vrie:
Zaoterdig 24 september óm 14.30 oere in 't Forum aan de Èngelkampsjtraot.
Entrepries is € 6,50 p.p. mer hievrue krieg geer dan uch nog eine consumptiepenning.

Mèsdeiner

Oppe legere sjool kouw pesjtoor vraoge wae mèsdeiner wól waere. Ich gouf mich meteen op. 'ne Grote wunsj van mich zou oetkómme. Ich haw al dèkser thoes de mès naogesjpeeld. Ein altäörke geboed mit witte lakes euver de keuketaofel, de kemune oetgedeild, de mès wien (ranja) gedronke oet ei glaas mit zilverpepier dróm haer en gank zo mer door. Gepraek haw ich ouch al, mit de erm wied oetein, al waar 't mer veur de hóndj en de hounder. 't Confiteor koosj ich van boete en de driede Gregoriaanse mès haw ich zo dèks geheurd dat ich die druimentaere koosj zènge.

Naodat pesjtoor aan de meister naogevraag haw of veer oet ein goud kateliek gezin ware, woort aafgesjpraake dat veer op gounsdigmiddig zouwe gaon oefene.

Same mit twee vrunj góng ich, toch e bietsjke zenewechtig, nao de sacristie. Pesjtoor vertèlde ós dao waat veer mouste doen en veural waat veer mouste laote. Veer trókke ós de superplie aan en vuilde ós bekans den Heilige Vader zelf. Pesjtoor leit ós ouch nog op zien teike ein kruuts make en vónj dat 't d'r goud oetzoug.

Daonao góng veer mit z'n alle nao d'n altaor en pesjtoor wees ós de ciborie, 't water en de wien, 't tabernakel, de kósses en de sjelle.

Opens kouw de maad häöm haole, went hae haw ónverwachs bezuik gekrege. Mer, hae zou zó trók zeen, zag 'r.

't Doerde 't ós te lang en veer pakde al veurzichtig de sjelle om te loestere wie die klónke in die laeg kirk. 't Kónsèr dat veer toen höbbe gegaeve waar oorverdovend. En waem 't eesjte sjmeet weit ich neit mee, mer 't gevolg waar ei kóssegevech op d'n altaor.

En opens sjtóng pesjtoor weier dao, boete aom en mit 'ne knalroje kop. Hae sjikke ós mit eine vinger nao de sacristie, trók ós de superplie oet en zag: " Geer, geer, waert vanzelaeve gein mèsdeinesj. Geer mótt uch sjame. D'r oet!" Hae is noots op dat besjloet trók gekomme. En waat veer thoes en in de klas vertèld höbbe, weit ich neit mee...

©johnhertogh

Bezunjere sjeurkalender 2017 mit teikeninge van Jan Hermans, de brouwer van Teun, bie gelaeg van 90 jaor Veldeke en 't 100^e gebäörtejaor van Teun.



Bie gelaeg van de 90e verjaor daag van Veldeke en de 100^e gebäörtedaag van Teun Hermans in 2016, geef de Veldeke Krènk Zitterd eine bezunjere sjeurkalender veur 't jaor 2017 oet. 't Is eine kalender mit teikeninge van Jan Hermans, de brouwer van messjien waal de bekèndste inwoner van Zitterd oots, Teun Hermans. De kalender wurtt in een gelimiteerde oplaag oetgegeave. Neit allein 't feit dat de kalender wurtt opgesieerd mit teikeninge van Jan Hermans maak van de kalender ein collectors-item. Ouch 't gegaeve dat geïnteresseerde hunne naam kenne verbènje aan ein of mee daag ("Deze daag wurtt uch aangebaod door..."), make deze kalender bezunjere. Leuk is 't óm de kalender emes kado te doen, en/of bie eine bepaolde daag de naam van b.v. de kènjer of kleinkènjer oppe kalender te vermelje.

Veur de vermelding van eine naam op eine datum vraoge veer €10,00. Eine losse kalender kos € 15,00. Es geer inteikent op eine kalender en ouch eine naam verbèndj aan eine daag dan kos dit uch mer € 22,50, dit is dus inclusief de kalender zelf. Jedere extra perseunlikke daag kos € 7,50. Het toekenne van de perseunlikke datums vindj plaatsj op basis van volgorde van aanmelding, dus wae 't eesj kump, dae 't eesj maalt.

Naamsvermelding doorgaeve en insjrieve op de kalender kènt pès uterlik 1 augustus 2016.

Veur mee informase, 't zich insjrieve veur de kalender en 't doorgaeve van de daag en naam dae op de kalender mótt kómme te sjtaon, kènt via de secretaris van de Veldeke Krènk Zitterd, Patrick Werdens:

Bie veurkeur via e-mail: veldekezitterd@gmail.com

Wilt geer ein insjriefformeleier óntvange? Bel dan mit til.: 046 - 458 71 40

't Versjöldigde bedraag mótt euvergemaak waere op bankraekening NL85 RABO 0187 6214 54 t.n.v. Veldeke krènk Zitterd. Op moment van óntvangs van 't bedraag op de bank wurtt de datum gereserveerd.

De sjeurkalender zal op 24 september e.k. versjiene.



Antjwoorde Aeve Prakkedènke

Antjwoorde: 1 B, 2 A, 3 B, 4 D, 5 A, 6 B, 7 C, 8 D, 9 A, 10 C

Höb geer ein biedraag veur de volgende oetgaaf, sjik dees dan nao

veldekezitterd@gmail.com